

Gospodine Predsjedniče Generalne skupštine,
Gospodo Visoki komesaru za ljudska prava,
Gospodine Predsjedniče Savjeta za ljudska prava,
Ekselencije,
Dame i gospodo,

Dozvolite mi da vam na početku, g-dine Predsjedniče, čestitam preuzimanje ove veoma važne funkcije predsjednika Savjeta za ljudska prava.

Velika mi je čast da se, u ime Bosne i Hercegovine, obratim Savjetu za ljudska prava u Segmentu na visokom nivou. Ovo je odlična prilika da se sagleda šta smo sve postigli po pitanju poboljšanja zaštite ljudskih prava na nacionalnom i globalnom nivou tokom protekle godine.

Gospodine Predsjedniče,

Dozvolite mi da vas podsjetim da je Bosna i Hercegovina imala čast da bude član Savjeta za ljudska prava u periodu od 2007. do 2010. godine. Iskustvo stečeno tokom članstva je za nas vrlo korisno u mnogim segmentima. Poboľjšali smo obuku našeg osoblja, ojačali kapacitet naših nadležnih institucija u cilju obezbjeđivanja punog i efikasnog učešća svih zainteresovanih strana, uključujući vladine i nevladine organizacije i organe, te akademski i privatni sektor u proces redovnog izvještavanja organa Savjeta za ljudska prava, sprovođenja odredbi ratifikovanih instrumenata za ljudska prava i uključivanje njihovih preporuka u naše akcione planove. Danas, kao država posmatrač u Savjetu, i dalje pridajemo veliki značaj njegovim aktivnostima, dijeleći naše stečeno znanje i praksu.

Moja zemlja daje prioritetan značaj poštovanju ljudskih prava i osnovnih sloboda jačanjem demokratije, multikulturalnog dijaloga i uvažavanja nacionalnih, kulturnih i religijskih različitosti, kao i suzbijanjem svih oblika diskriminacije i netrpeljivosti prema članovima bilo kojeg dijela društva. U tom smislu, stvaranjem efikasnijih mehanizama u skladu sa međunarodnim standardima ostvarujemo konstantni napredak.

Dozvolite mi da vas ovdje obavijestim da u kratkom vremenskom periodu očekujemo ispunjavanje obaveza koje proističu iz presude Evropskog suda za ljudska prava u slučaju Sejdić-Finci.

Želim iskoristiti ovu priliku da naglasim da se Bosna i Hercegovina pridružila porodici od 92 države koje su izdale *Standing Invitations* za specijalne procedure Savjeta za ljudska prava. U protekloj godini Bosna i Hercegovina je imala zadovoljstvo ugostiti g-đu Rita Izsak, nezavisnog eksperta o pitanjima manjina u septembru 2012. godine i g-đu

Rashida Manjoo, specijalnog izvjestioca o nasilju nad ženama u oktobru 2012. godine. Izvještaj g-đe Izsak će biti razmatran i usvojen na ovoj sjednici Savjeta. Biće nam drago ugostiti i g-đu Farida Shaheed, specijalnog izvjestioca za kulturna prava, koju očekujemo početkom maja ove godine.

Bosna i Hercegovina je ponosna što se nalazi među prvih deset zemalja koje su ratifikovale Opcionalni Protokol Međunarodnog sporazuma o ekonomskim, socijalnim i kulturnim pravima koji će stupiti na snagu za manje od tri mjeseca, 5. maja.

Savjet ministara Bosne i Hercegovine je poduzeo neophodne korake za uspostavljanje Nacionalnih preventivnih mehanizama za Opcionalni protokol Sporazuma protiv mučenja i drugih okrutnih, neljudskih i ponižavajućih postupaka ili kazni, a u skladu sa pariškim principima. Ovo pitanje je značajno za nas. U cilju postizanja najboljih rezultata, uključili smo sve zainteresovane strane iz vladinog i nevladinog sektora i međunarodne organizacije.

Saradnja sa nadležnim organima UN-a je također bila vrlo konstruktivna. Ispunili smo naše obaveze izvještavanja nadležnih UN komisija i organa kroz uspješno predstavljanje početnih i periodičnih izvještaja o stanju po pitanju ljudskih prava. Prošle godine su organi UN-a razmatrali tri izvještaja Bosne i Hercegovine: drugi periodični izvještaj o zaštiti prava radnika migranata i njihovih porodica, kombinovani drugi, treći i peti periodični izvještaj Komitetu za prava djeteta i izvještaj Komitetu za ljudska prava. Ove godine je planirano razmatranje izvještaja o eliminaciji diskriminacije žena pred CEDAW Komitetom. Uz visoko uvažavanje primjetili smo da su ovi uvaženi organi prepoznali napredak koji smo najvećim dijelom ostvarili u oblasti zaštite ljudskih prava.

Na ovom posebnom forumu želio bih spomenuti Regionalnu donatorsku konferenciju koja je održana 24. aprila 2012. godine u Sarajevu i na kojoj je prikupljeno oko 300 miliona eura za adekvatan smještaj i bolje uslove života za najugroženije izbjeglice u regionu. Želim iskoristiti ovu priliku da se još jednom zahvalim UNHCR-u i ostalim zemljama donatorima za njihov doprinos, te istaknem uspješnu regionalnu koordinaciju i saradnju.

Iako je postignut određen napredak u njegovom iskorijenjivanju, problem trgovine ljudima je još uvijek prisutan kako u našoj zemlji tako i u čitavom regionu. Naše nadležne institucije na svim nivoima vlasti su preduzele značajne napore i mjere kako bi se konačno zaustavila ova nezakonita radnja. Mi smo u potpunosti svjesni činjenice da je ovo problem regiona i da samo zajedničkim regionalnim pristupom možemo postići određene rezultate. U tom pogledu smo dugi niz godina imali uspješnu saradnju sa nadležnim institucijama susjednih zemalja.

Efikasno funkcionisanje Opšteg periodičnog pregleda kao jednog od glavnih mehanizama Savjeta je od ogromnog značaja. Od velikog značaja je i to što najnaprednije zemlje u oblasti poštovanja ljudskih prava mogu dobiti korisne preporuke i preći već dostignuti nivo. Drugi krug Opšteg periodičnog pregleda je planiran za 2014. godinu i mi smo već počeli sa pripremama našeg izvještaja.

Ciljevi milenijumskog razvoja (MDG) su jedan od glavnih stubova u nastojanju da se promijeni svijet, i da se poboljšaju životi ljudi. Boreći se protiv siromaštva i nepravde mi istovremeno napredujemo ka boljem svijetu kada je riječ o poštovanju ljudskih prava. Premda pojedine zemlje neće uspjeti ispuniti sve ciljeve MDG do 2015. godine, trebalo bi da zajedno radimo na postavljanju novih ciljeva i programa i poslije 2015. Ogromni tehnološki pronalasci i više pravde i solidarnosti u međunarodnim odnosima bi trebalo posebno da donesu pozitivne rezultate i čak najudaljenijim i najmanje razvijenim zemljama. Preduslovi za zaštitu ljudskih prava i unapređenje kvalitete života su bezbjedan pristup pitkoj vodi i zdravstvu, neophodna medicinska njega i lijekovi, precizniji statistički podaci, širenje informatičke tehnologije, itd. Bez održivog razvoja nema ni održivog napretka u zaštiti ljudskih prava.

Gospodine Predsjedniče,

Nadalje, želim obratiti pažnju na značaj održavanja posebnih sjednica Savjeta za ljudska prava i konstruktivnog rada u hitnim situacijama. Ova sposobnost Savjeta da reaguje u hitnim situacijama, a posebno u najgorim slučajevima ugrožavanja ljudskih prava, je ključna i pozivamo da i dalje nastavi s tim radom.

Bosna i Hercegovina pažljivo prati dešavanja u Siriji. Svjedoci smo tragičnog gubitka mnogih nevinih ljudskih života kao posljedica Asadovog režima koji ubija sopstveni narod. Osuđujemo one koji koriste nasilje nad civilima. Krajnje je vrijeme da se međunarodna zajednica ujedini i to zaustavi koristeći sva potrebna sredstva.

S druge strane, Bosna i Hercegovina, poslije uspješne intervencije u sjevernom dijelu Malija, očekuje znatno poboljšanje humanitarne situacije, a posebno na sjeveru zemlje. Izlišno je spomenuti naša očekivanja da vidimo jačanje i širenje procesa pomirenja u Afganistanu, kao najbolji garant mira i prosperiteta prijateljskog naroda koji dugo vremena pati.

Gospodine Predsjedniče,

Bosna i Hercegovina je zemlja koja se, kao i svaka druga zemlja u svijetu suočava sa sopstvenim izazovima. Ali ti izazovi nas neće obeshrabriti u borbi za bolje poštovanje ljudskih prava i bolji život naših građana.

Prolazimo kroz nekoliko teških godina ozbiljne finansijske i ekonomske krize i stroge mjere koje primjenjuju mnoge vlade u svijetu imaju negativne posljedice na sve aspekte ljudskog života, ali uz nadu da to neće dugo potrajati. Ali dok se suočavamo sa mnogim restrikcijama i neprijatnostima u današnjoj svjetskoj privredi, ne bi trebalo da dozvolimo da to bude prepreka postizanju plemenitih ciljeva u poštovanju ljudskih prava.